
Scheibenschlagen

2001

Nachname Vorname

Löschgruppe Graf-Gurnau

Grafer Kapelle

Liabe Leit, heint mecht mar enk olla schia begrießa,
wos d'rnoch iatz kimmt, sell kuan verdrießa.
Noch oltem Brauch tia mar ou Böller schiaßa.
A Verübl, dös war ins gor it recht,
a Hetz muaß sei, wega dem tia mar's decht.
D'Fuirwehr tuat enk in dr Noat olli halfa,
drum seits it beas und lot'sas galta.

Die earscht Scheiba, die hella,
keart dr Grafer Kapella.
Daß dr hl. Johannes von Nepamuk weiterhin über ins wocht,
und in dr letschta Stund für olla a Fürsproch mocht.

Da Böller hobts keart, iatz gia mar's on,
zearscht keima huira d'Grafer dron.

Fam Hotz Oskar Edith

Dr Oskar hat des Türli vom Mullkübel offgmacht
da hat ihn schua an Siebenschläfer anglacht.
Er hat des Viechli glei in am Käfig g'fonga
zum Verschenka ohne eppas zum Verlonga.
Iatz schiaß mar aucha no a Raketa gonz dick,
für deis Johr wünsch mar enk an Haufa Glick.

Hotz Hannes

Dr Hannes tuat geara ums Haus da Weg saniera
do braucht ma viel Sand und Bäum zum Planiera.
'An gonza Wald hinterm Haus
do geahrt a Birka für mi alli mal aus' -
hot er sie denkt
und den Baum in die folsche Richtung glenkt
Do hot er decht glott den Masta derwischt
do hat's nu mehr krocht und zischt
S'negscht Mol tuasch des auf Silvester verschieba
nocha konnsch ins deine Raketa spendiera.

Hotz Lydia und Beate

D'Lydia und d'Beate tia viel auf Gäst umapassa
Kaum sei sie ausm Haus kannta ja kema Gäst von der Stroßa.
Daß des besser kennts koordiniera
mechtat's enk nit bei ins im Internet platziera.
Viel Glück und an Haufa Gäst im huiriga Johr
des wünscht enk d'Fuirwehr -- eh klor !

Fam Hotz Raimund Monika

Wer geht durch den steila Wald mit am Kübel in der Hand?
Es isch der Raimund, er sucht im Gelände an festa Stand.
Um jedes Grantali tuat er si bucka
er will nu kua Beerli mit dem Schuch derdrucka.
Auweh, da hat er da feschta Halt verlora,
des klua Bamli ischsein Retter o numma gwoara.
D' Füß unta aus und mit'm Rugga ganz verdraht,
den ganza Kübel hat er ono ausglahrt.
Uan Ripp hat er si brocha
und liegt im Spital a ganza Wocha.
Zum Glück isch nit mehr passiert
und die Verletzungen sei schua wieder auskuriert.
Iatz lassa mir dir no a Raketa auafliega
S'nächts Jahr selltest aber mia Granta kriaga.

Fam Hotz Stefan Petra

Dr Stefan hat am Haus in Grins schua viel grichtet
und im Garta an haufa Holz augschlichtet.
Die Stiega isch o schua betoniert
die Zeit vergeht und es pressiert.
Ins in Graf will`sch bald mit deiner Familie verlossa
Und gehsch aua auf Grins in die schianscht Gassa.
Viel Glück beim Umbau in Grins
aber bleibsch decht no an Grafer für ins.

Hotz Martin

Mit dar negscht Scheiba isch dar Martin dran,
dear hat ins huira bewiesa, daß ma sogar mit ama Opel richtig sporsam fohra kann.
Der ÖAMTC hat da sporsamsta Autofohrer gsuacht,
der Martin isch 2. gwora aber er hot sicht denkt verfluacht.
Mit a bissli Glick isch er nocha decht ins Finale noch Wien kema,
nur den Verkehr - Martin- den muasch decht zearscht gwena.
Iatz woasch sicher schua besser wia's geahrt,
daß die Tankuhr an der gleicha Stell wia am Anfang steahrt.

Fam Schröcker Hermann Elfriede

Dr Hermann und d'Frieda tian sie guat über d'Wirtschaft informiera
und wissa glei wo sie als nächst tuat a Gschäft plaziera.
Im Gorta isch dr Hermann viel beim Groba
oder im Wald an Baum umschloga.
Wenn dr z'eng weara die Wänd im Haus
nocha konnsch ho halfa bei dem ASI-Projekt in Landeck aus.
Det kenna sie dei Bergwachtwissa sicher braucha
miar schiaßa dar auf jeden Fall a Raketa aucha.

Schröcker Evelin

Dass ma in Landeck schwar an Parkplatz findet ist allgemein bekannt,
aber d'Evi hat was dagegen in der Hand.
Ma sieht sa öfter mit dem Bus auf d'Arbeit fohra,
da kann ma Bezin und Nerva spora.
Der Gehsteig isch allerdings nit beleuchtet s' ganze Jahr,
aber der Papa stellt des auf der Gemeinde glei klar.
Mir tia iatz Graf mit ara Raketa hell erleichta
da findest da Weg zur Bushaltestell o viel leichter.

Asia Cafe

S'Asia Cafe isch guat bsucht und es stiahn olli an Haufa Auto vorm Haus,
deis geat sich oft gar nit mit'm Platz richtig aus.
Aber Wunder isches kuans deis woäß a jeder,
der schua amol zukeart isch,
die Bedienung isch guat und wenn ma eppas bstellt, steahts prompt aufm Tisch.
Daß weiter soviel los isch und d'Gäst nit ausbleiba,
tian mar enk iatz no a Scheiba außatreiba.

FA Streng

Die Firma Streng isch ollseits bekohnt,
molt Häuser zomm bis kimmt lei mia Sond.
Am Zoll dinna wor`s letscht`s Jahr oh amol soweit,
die Zeitunga schreiba glei, daß es do an nuia Abstellplotz für'n Fuhrpark geit.
Wenn des woahr war und miar des genau wischta,
dat d'Fuirwehr glei teiflich aufrischta.
In enkara Halla z'Grof daußa kannta mir nocha an haufa Auto platziera,
und darmit d'Londecker amol richtig konkuriera.
z'Streauga hot's iatz für enk oh a Arbeit geba,
und d'Fuirwehr hofft es lossat's ins darfür beim Scheiba kassiera oh wieder guat leba.
Und daß die Firma beim Strengener Tunnel oh wieder wie olli olles recht guat mocht,
schaua mir, daß iatz noh an richtiger Böller krocht.

FA Jais Werkstätte

Reifen Jais isch jedermann an Begriff,
Qualität Bedienung und Service mit Pfiff.
Winter- und Summeroafa und olls was ma sinscht nou so braucht,
seis a Felga oder nu für's Fahrradli an nuia Schlauch.
Miar wünsch für die Zukunft a guat's Geschäft und viele Kunda,
zum salla draht die negscht Scheiba a extra Runda.

Prantauer Anna

Dia Scheiba isch aus d'r Gluat ,
miar hoffa es geht d'r Anni guat.
A Raketa geiht iatz auchi ganz hell,
viel G'sundheit wünsch m'r auf d'r Stell.

Victor und Marina

Wenns schneit heart ma da Victor s'Auto starta
und daß es o anspringt muaß ma natürlich ou warta.
Aber wenns amol louft nocha tuat'r im Schnee d'Kurvalog testa und allerhand
ausprobiera
vielleicht tuat er insgeheim auf a Ralley trainiera.
6 Wocha USA-Urlaub hat er huira ou schua gmocht
wer woäß vielleicht derzeit ers ins und es weard amol in dr Fuerwehrrhalle an
Diavortrag gmocht.
Daß du kansch wiederamol in Urlaub fohra und mit deem Auto unfallfrei tuasch bleiba
spendiera miar dir iatz no a Scheiba.

Matt Andreas

Da Andi hoba mar iatz auf dr Lista douba,
und miar kenna ihn huira it lei louba.
Aber bei da Weiberleit isch dr Andi guat bekohnt,
hat er decht für des Gschlecht a guate Hond.
Daß dr dazua s'negscht Johr alls gelingt,
lossa miar an Böllr sausa gonz gschwind.

Petter Johann

Joschi deis isch decht gonz klor
hoßt inserer nuier Grafer- Fussballstar
In Sölden haba mar ihn s'erschtmal teschtat und probiert
ob er sie oh in insere Mannschaft so richtig integriert.
Für huira tusch deine Wadla guat traniera
und mir tia dir iatz no a schiane Scheiba spendiera.

Fam Matt Egon Annemarie

D'r Egon und die Annemarie
kennas kaum erwarta,
bis sie in dr Hand hoba d'Jassr-Karta.
Aber dr Egon, gar kua Frog,
hot huira Nachwuchs kriagt auf seine olta Tog.
So tia miar enk herzli gratuliera
und lossa weit außi a Raketa marschiera.

Spiß Roland

Dar Roland kriagt huira s'erscht mal a Scheiba,
da haba mar natürlich überlegt, was kannta mar über ihn schreiba.
Viel haba mar nit in Erfahrung bracht,
ma siecht'n nia ma heart'n nia, ma woäß nit was'r aso macht.
Außer daß'r Beck isch in Ischgl dinna und an haufa Brot macht,
des isch sicher nit hetzig wenn um 2 oder 3 in dar Friaht dar Wecker kracht.
Im negshta Johr losch die amal blicka,
nacha kenna mar a schians Sprichli schreiba und nit lei dia Schiaba acha schicka.

Fam Matt Richard Rosi

In Landeck kann ma nit amol sicher parka
da hasch glei an Schada am Auto, des muasch amol packa.
Der unbekannte Fahrer isch verschwunda
den hat der Richard bis hei no nit gfounda.
S'nächscht mal tuasch vorm Kiosk parkiera
na hasch alls im Aug und brauchsch nit soweit zum Auto spaziera.
Daß den Unbekannta s'schlechte Gwissa teiflich plogt,
weart iatz no a Raketa aua gjogt.

Matt Christian

Dar Christian, deis hat sich niamand denkt,
schua seit einiger Zeit die Geschicke vu dar ÖVP im Bezirk mitlenkt.
Da isch'r als Kassier in dar Führungsspitz,
wear woäß, vielleicht weart daraus amal an Regierungssitz?
Christian, tua du bei dar ÖVP lei fest kassiera,
vielleicht kanntatz ja mit dem Geld s'negscht Budget-Loch mitfinanziera.
Sinscht sigt ma da Christian viel umafahra,
wenn'r sich a Radli koufa tat, nacha kanntar sich an Haufa Benzin darspara.
Zum Schluß winscha mar dar in dar Politik nou viel Glick,
und lassa nou an Böller kracha ganz dick.

Maidel Wilfried

Im Willi a Gedichtli schreiba, deis war nit schwar,
deis tat viel leichter gia, wenn'r a bissli öfter umma war.
Z'Fendls bei der Freundin sei er olli hoba miar darfrogt
und daß er iatz an nuis Auto hot.
Mit ama Audi A6 siecht man ab und zu um a Kurva flitza,
und im Wifi bei nam Computerkurs schwitza.
Und daß die EDV kuane Schwierigkeita mocht
iatz no an Böller krocht.

Maidel Johann

Dr Johann als guater Bastler jo bekommt,
flickt viel an Haushaltsgeräte umanond.
Ob Bohrmaschine, Flex oder andere Waschmaschin
mocha tuat'r olls , was er muant des isch hin.
Nu isch deis Hobby a platzaufwendige Soch
und daß du alls unterspringsch iatz nou an Böller krocht.

Fam Schmid Robert Monika

Zur Scheiba lossa miar nou a RAKETA steiga
und tian bar Monika und bam Robert bleiba.
Eppas a Orbat hoba sie olli z'tian,
drum hob sie's ums Haus olli so schian.
Mit enk komma olli so nett diskutiera,
drum keima miar zu enk ou wieder geara Scheiba kassiera.

Schweiger Eva

Was setta mar enk huiru vur Eva berichta,
ma heart nuit beasas, als tat sie die ganza Beweise vernichta.
Im Pitztal arbeitet sie als Schlilehrer,
aso a feschas Madli hat da sicher an Haufa Verehrer.
Aber d'Eva hot ja ou an Freind schua seit am Johr,
da sein andere Buaba sicher kua G'fahr.
Eva, lass die im negshta Johr wieder amal blicka,
und zum Schluß tian mar dar a Scheiba außa schicka.

Fam Nitsche Kurdoglu Gerald Brigitte

Der Gerald isch wieder bei ins im Land
da macht er tolle Ausstellunga des liegt ja auf der Hand.
Auf inserer Homepage haba mir ihn ou guat platziert
du bisch ja für Graf a prominenter Mann -- garantiert.
Auf der Seitä im world-wide-web kann ins jeder aus aller Welt besucha
und kuaner braucht di mia im Telefonbuch sucha.
Viel Erfolg beim Mala und Skizziera
so lossa miar dir iatz no a Raketa aucha marschiera !

Horvarth Iris

D'Iris hoba mar huira s'aller erschte Mall auf dar Lista,
miar tata geara eppas hetzigs schreiba, wenn mar lei eppas wishta.
18 Jahr isch d'Iris vor kuzem gwoara und hat a tolle Feier gmacht,
in dar Fuierwehrhalle hat sie gfeiert und glacht.
Ob d'Iris schua an Freind hot deis wissa mar nit und kenna ou sinscht numma viel saga,
miar hoffa, daß mar im negshta Jahr a bissli mia über d'Iris darfraga.
Zum Schluß zinta mar dar Iris an Böller an,
und fürs negscht Jahr mechta mar ihra sogä "Stell amal eppas an".

Fam Horvarth Erich Elisabeth

Dr Erich hot z'letscht Jahr mit seiner Schulclass bei am Handydesignwettbewerb
mitgmocht,
und über den ersta Platz hot er ja gor nit glocht !
Mit der Gewinnerin isch er auf Wien zu ama Fototermin gfloga
und hot für die gonz Klass an Gutscheine für a Sportwocha am Faakersee gwunna -- isch
nit gloga
Aber für die Aufsicht von ara Madlaklass hot Elisabeth und dr Erich beide Händ voll
z'tian kett
mit da eigana Kinder war's decht nit so a Gfrett.
Dahuam ankema wora sie gonz ausgschlaucht
und hoba glei a Portion Erholung braucht !

Horvarth Thomas

Dar Thomas tuat sou allerhand,
für'n Zaggi isch'r gfohra durchs ganze Land.
Dert hottar nämlich Pizza ausgfahrt,
und hatsa für'n Zaggi glei vor Ort kassiert.
Im Altersheim in Grins isch dar Thomas zur Zeit,
da muasch di nit aso anschreia lassa wia beim Paras und huam ischas ou nit weit.
Fubballna tuat dar Thomas ou recht geara,
nu verliert'r mit da Pianner recht oft konn ma heara.
Viel Glick vorm Tor winscha mar dar fürs negscht Jahr zum Schluß,
vielleicht kimmsch ja s'uan oder andere mal amal frei zum Torschuß.

Horvarth Martha

D' Martha hat huira im Summer viel Bsuach von der Verwandschaft kett,
die Ausflügla und Unterholtage wara alla recht nett.
Dass sie nit olli allua muaß im Haus ummarena,
hat o manchmal d'Carmen beim Kocha halfa kenna.
So isch bei der Martha oh die Gartapflege nit zkurz kema,
weil schließlich muaß ma sich oh Zeit für d' Pflonza nehma.
Z'negscht Mal tuat die d'Fuirwehr bsuacha gia,
wenn mar nocha kassiera tia.

FA Wille Egon

Dar Getränkehandel Wille, deis liegt decht auf dar Hand,
isch vu dar Grafer Fuirwehr dar Bier und Limo Lieferant.
Und wenn mar amal a Fescht hoba sou wia s'Scheibaschlaga,
da kenna mar ou d'Bierbänk und d'Warmhaltebehälter gratis vum Wille hoba.
Für deis mechta mar amal recht herzlich Dankschian sogä,
und schiaßä enk iatz a Scheiba übern Bichla ocha.

FA Wille Harald

Vum Harald kenna mar nit viel nuis sogä,
er tuat halt alli nou mit die Silo-Waga umafahra.
Do transportiert'r an Haufa Socha,
und tuat seine Kundschofta sicher an guata Preis dafür mocha.
Mir winscha dar für s'negscht Jahr viel Erfolg und daß d'Auftrag nit ausbleiba,
und zum salla tian mar dar iatz a Schieba ochatreiba.

Knabl Erika

In der Friaht sieht ma d'Erika mit ihra Kinder in Graf daussa worta,
bis der Bus kimmt für'd Schual und in Kindergorta.
Und liaba Leit, no eppas hob'mar keart,
nämlä dass die Familie bold greaßer weart.
Im Mai sell a Poppali aus d'r Wiaga locha,
d'Fuirwehr lasst iatz schua an Böller krocha.

Fam Moschen Richard Anni

Beim Richard und der Anna sein am Wochenend alli die Buba mit Enkala zu Gast,
und nehma ab so manche Arbeit und Last.
Da habas oh olli die Enkelkinder schian,
weil die kenna immer mitm Hund spila und Gassi gian.
Die Fuirwehr wünscht enk weiterhin viel Gsundheit
auf des iatz no an Böller schreit.

Pammer Herbert Kathrein Anni

Dr Herbert isch an vielbeschäftigter Mann,
der des mit seim Taxiunternehmen wirklich guat kann.
Wenn ma ou no um 2:00 z'Nacht vorbei fohrt, sieht ma a Licht brenna,
so lang arbeita muaß ma ou mega und kenna.
Anni, überrasch in Herbert in der Friaht,
und tiats enk gemeinsam erhola giah.
Dass aus enker Erholungstag o sicher was weart,
krocht der Böller den ma iatz heart.

FA Thurner Josef

Übern Thurner Pepi isch nit schwar eppas zum Schreiba
der isch's gonz Johr am Weg für d'Firma Aufträg intreibta.
Ob an Rohrbruch, a Heizung oder a nuis Bad
der Pepi woas alli an Rat.
Daß d'Firma guat louft sal isch schu zum Glouba
ma heart amol überall daß d'Leit die Firma Thurner loubta.
Un daß dein Umsatz nie abwärts geht
ma iatz no an Böller heart.

Fam Thurner Udo, Evelin

Für'n Udo und d'Evelin war deis a gonz aufregendes Jahr
Nachwuchs haba sie kriagt und dazubaut hoba sie, ja deis isch wahr.
Wunderschia ingrictat sei des Haus derzeila d'Leit
aber deis mechta miar gera salber wissa drum machts enk auf an Bsuach va dar
Fuerwehr bereit.
Do miaßta miar enkre Wohnung und natürlich s'Poppali inspiziera
und beira Heizung vum Thurner miaßta mar dabei sicher nit darfriera.
Und daß enk's Glück weiterhin darhalta bleibt,
schloga miar iatz die Scheiba bsunders weit.

Petter Hedwig

D'Hedwig und ihr Wohnung des isch a eigene Wissenschaft
Tischdecka, andere Deckala und allpott an ondars Vorhangli ums Fenster uma locht.
Dia Wohnung tuat sowieso allpot an anders Gsicht kriega
weil d'Hedwig tuat all paar Wocha d'Kastla verschiaba.
Aber wunderschian dekoriert isch es olli, deis hoba schua viel Leit gseit
mit ara Dekoration für'd Fuerwehrrhalle hatta miar allerdings ou a groaßa Freid.

Fam Ruetz Markus

Im Markus und dr Christine isch mit'm Nachwuchs d'Wohnung z'klua gwora
drum sein glei zwoa Reim darzua gmietet woara.
Sie hoba vergrößert und renoviert
sou hoba d'Kinder mia Plotz zum Spiela kriagt.
Ja Markus mit no mia Kinder wearsch eppa dazubaua miaßa
nocha hatt miar wieder eppas zum Schreiba und tata ou nit verdrießa.

Gapp Sabine

D'Sabine tia mar huira a bissli ploga,
da hat ma sie nämlich 2 Wocha gar nia gsecha mit ihrem Woga.
Warum sie genau dia Zeit z'fuaß gonga isch wissa miar nit gonz genau,
aber wahrscheinlich hoba d'Schandi ihra koltat da Führerschein au.
Daß dir deis numma so schnell passiert
iatz no a Raketa aua marschiert.

Moschen Stefan

Da Stefan sieht ma viel bei'ra Tankstell stian
wos weart der eppa olli so tian.
An Sprit für sei Motorrad weard ar schua braucha
sinsch miaßt'r irgendwann übere Pass amol z'Fuaß aucha schnaufa.
Für seine Toura die er mit seim Motorrad mocht,
muaß die Rennmaschin glänza wie a Procht.
Fahra tuat dr Stefan ja recht viel
und mir tian hoffa, daß sei Jamaha ihn bringt alli gesund ans Ziel.

Kirschner Katharina

Dia Scheiba für d'Kathi schiaß mar aussa ganz weit
weil sie hat hinter sich a schwarze Zeit.
Miar wünsch dir viel Gsundheit und Lebensmut,
daß es dir no lang geht guat.

Nöbl Ferdinand

Dr Ferdl und d'Romana so hat ma ins darzählt,
hoba sich im Summar fleißig mit'm Holz abquält.
Da hobat's g'ostet, klopft und klopa,
wahrscheinlich zviel - weil da hats'm sogar da Keil vom Klubar herboga.
Gschunta hat er wie vom Teufl gritta,
und in seiner Euphorie hat er sogar no die Obstbäum ums Haus umma gschnitta.
Aber Ferdl iatz isch a Ruah,
weil Holz hosch iatz für Jahrzehnte gnuag.
Daß da negschta Summar die nit muasch so ploga
tia mar dar iatz no a Scheiba ocha schloga.

Nöbl Anna

Iatz isch aua fr d'Nbl Anna die Scheiba
s'letscht Jahr hot sie miea bald da gonza Summer im Spital dunta bleiba.
Pensionishta hoba um a Haar da Ausflug verschoba,
weil sie gmuant hoba, d'Anna isch in Urlaub gfloga.
Von dera Luftfahrt isch d'Anna ganz fasziniert,
und wundert sie olli, da da nit mia passiert.
Ma sieht sie oft aufm Bankla vorm Haus sitza,
weil da kanns sie da Fliegar zuschaua, wie sie ber Landeck flitza.
Da no long so bleibsch wie du bisch,
iatz no a Raketa aua zischt.

Nbl Thomas

Dar Thomas, des hat eppa jeder schua mitkriagt,
seit einiger Zeit 1 Fua a bissli hinter sich nach ziacht.
Deis kimmt daher weil'sn hat mit'm Motorrad gschmissa,
und dabei hat'r sich smtliche Bantla im Knia abgrissa.
Vu dar Trams isch'r achagfahra bei am schlechta Liacht,
da hat'r kurz nit gsecha und des Motorradli schua auf'n Abhang acha ziacht.
Er hat's grad nou umma darrissa da'as n nit bern Bichla acha haut,
aber gholf a hat's nit viel, nacha hat's n halt auf dar Bergseite baut.
Er isch operiert woara und mua a lange Therapie macha,
und s' Kreuzbantli mua ou nou grichtat weara da hat dar Thomas nit zum Lacha.
Guate Besserung wischa mar dar und da as Knia wieder richtig weart,
und zum salla iatz a Scheiba acha geagt.

Nbl Hannes

Da Hannes sieht ma fter ins Stampfle aua fahra;
da mu a Frau im Spiel sei da braucht ma gar it fraga.
D`r Hannes tuat sa fter vom Gym huam fier a
amal war er a Stund z'spat, sie war schua bald beim dr`frier a.
A so a Stund isch glei verschlofa
sie sei aber mild gwest beim Bestrofa
Hannes tua dr irgend an Weckdienst organisiera
fr's guat lang Schlafa braucht ma si nit scheniera.
Wenn alla Strick reia
kenna o mir di aus dem Bett aua beia.
Sinsch haba mir iatz nix mia vom Hannes zu berichta,
er erfllt ja sinsch alle seine Pflichta.
Tua brav bleiba des kann ma gar it oft g`nuag sog a
drum wera miar iatz no a Raketta aua joga.

Fam Schlatter Engelbert Stefanie

In Engel und dar Steffani laß mar an Böllar krocha,
weil dia tia für 'd Grafer und Gurnauer d'Chronik mocha.
Da tia sie alte Fotos sammla und viel recherchiera
und wer will kann gera sein Beitrag dazu spendiera.
Daß der Engel wenn er in Stall geahrt nit verwechselt d'Schweir mit da Kiah,
hat'r miaßa zum Ogadoktor giah.
A Lesebrilla hat's miaßa sein,
daß er sieht wos er am Computer tippt ein.
Ihr weard sas nit glouba, dr Engel surft im Internet
und da wird's sicher oft spat bis er kimmt ins Bett.

Schlatter Harald

Da Harald tia mar huira a bissli ploga,
er isch nämlich wieder zum Gardasea gfohra.
Wia sichs keart tuat ma fein essa gia,
und die bescht Floscha Wein muaß am Tisch doba stiah.
So isch er mit ama Freind ins bescht Restaurant marschert
und der Kellner hot ihna des tuirschte Essa serviert.
Riesagarnela zamt Kopf und Fiaß hots geba,
hoffentlich war des Viech numma am Leba.
Sogar d'Fühler und d'Fiaß hoba dia zwoa Feinschmecker zombissa
isch decht schod, hoba sie denkt, sinsch weard deis Zuig lei verschmissa.
Als dia zwoa alls gessa hoba mit Haut und Knocha,
der Kellner hot sie da Bauch kebt vor lauter Locha.
Dr Harald denkt sie des war gar it bsunders , des konnsch vergessa,
snechst Mal geah i wieder a Pizza essa.

Dsubanka Maria

Dr Midl winscha miar iatz no viel Gsundheit
und daß behaltesch weiterhin dei Heiterkeit.
Und setasch für an Arbeit amol a paar Mander braucha
mir von der Fuierwehr kema gera zu dir aucha.

Kobler Gerald

Da Gerhard sieht ma ollpott amol
incha fohra ins Stonzertol.
Er hot do olli a heida Gneat,
weil's olli bis Flirsch incha geaht.
Do dinna holtat er in seim Orm
di Gabi, weil des isch sein Schworm.
Irgend wenn hatsch Du ober sella,
dia Gabi bei d'r Fuirwehr voarstella.
Iatz lossa miar nou an BÖLL'R gonz dick
daß er enk bringt an Haufa Glick.

Kobler Maria

D' Maria schaut auf Ihr G'sundheit guat
weil sie olli spaziera tuat.
Sie geaht mit'm Hintli in Kess'l aussa
do kann er noch Herzenslust umchasausa.
Ob'r isch im Fernsehen „ Reich und schian“
sieht ma d' Maria numma spaziera giahn.
Weil dös isch für d'Maria s'liabschte Programm
deas schaut sie sich olli geara on.

Imbiss/Dietrich

Wer beim Dietrich im Minirestaurant schu amol gwesa isch
hat sicher gmerkt da kema lei leckera Socha aufn Tisch.
Ob Fleisch, Beilaga oder andere Socha
des tuat er olli köstlich mocha.
Mir hoffa dein Lokal wird gut frequentiert
denn a guats Essa isch bei dir alli garantiert.
D'Fuirwehr mecht no amol für dei Einladung zu ama Essa Dankschia sogä,
darum tia mar iatz no a Raketa weit außa joga.

Fam Traxl Richard Frieda

Da Richard holtet eppas fit und g'sund
deas isch v'r Erna d'r groaße Hund.
Und wenn dös Viech nit olli folga tuat,
lupfts's dem Richard oft da Huat.
Ob und zua mocht der Hund seini eigana Runda
drum hoba mir ihn ou schua am Plon doba g'funda.
Iatz loßä miar nou a RAKATA , gonz dick
und leicha Dir für des Viech an längera Strick.

Fam Plattner Wolfgang Angelika

Wos follt enk zu Gardasee und Holza ei?
Na klor, deis kann nu di Familie Plattner sei.
Danebat findet d'Angelika no Zeit,
und schaut, ob's in der Volksschul a Orbeit für si geit:
Feschtla organisiera oder Kerza verziara,
Ausflug begleita und fescht fotografiara,
Kartoffelsuppe kocha und Kuacha bocha,
bei so ara Klassenmutti hot dr Lehrer leicht locha!

Fam Haslinger Hans Gertrud

Seit d'r Hons isch in Pension
isch im Solotgort'a für d'Schnezza vorbei dia Saison.
Mit ama groaße Kuchamesser
geht er auf d'Jogd vo dena Solotbletschafresser.
Er nimmt dena Schnezza weck dia guat Koscht
dia sein ober schneller wie an Pensionist vo d'r Poscht.
Dr'wurscha hote er si nit ums Verrecka,
schua hot er s'M'messer im Haxa drinstecka.
Und daß deis wieder guat v'rhoala tuat
haua miar nou an BÖLL'R ind d'Gluat.

Fam Winkler Franz Kreszenzia

Iatz lossa miar zur Scheiba nou a RAKETA marschiera.
Weil enk zwoa miaße miar huira schua saggrisch gratuliera.
Mitanonder hobe dia zwoa seit huira 160 Jahr am Buggl doba,
do kenna miar sie nu loba.
Daß d'Zenzl mit'm Franz nou long kann locha,
lossa miar ou nou an BÖLL'R krocha.

Fam Senn Arnold Ursula

Auf d'Augsburgerhütte sieht ma in Arnold gian s'gonz Jahr,
lei manchmal isch deis mit'm Weg a richtigs Gfar.
D'r Weg isch grichtet gor nit so schian,
dass kannsch auf d'Augsburgerhütte gian.
D'r Arnold hat sie denkt, wenn dia den Weg nit anständig richta,
fang i an Biena zichta.
An Imkerkurs tuat'r ou glei belega,
damit er kann seine Biena guat pflega.
D'Fuierwehr lasst iatz no an Böller kracha,
damit deine Biena viel Honig macha.

Senn Evi

Di Evi hot mit'm Studiara nuit mia im Sinn,
iatz isch si mit Leib und Seel' Bankerin.
Als Jugendclub-Betreuer in Zoms bei der RBO
organisiert si olls vo Kinobesuch bis Playbackshow.
Oder a Fuaßbollspiel im Tivolistadion
huam bringt si die Kinder mit Maskottchen und Luftballon.

Fam Senn Werner Brigitte

Weil dr Werner beim ASI gera eppas nuis probiert,
isch er glei für a paar Monat vo da Schandi karenziert.
Er denkt sie die Arbeit kann warta, da fong i nit glei on,
zearscht mach i nou a Nepal-Expedition.
Huam kiamt er kronk, der guate Monn
und wia sich's keart, steckt er glei sei Brigitte on.
Kua Wort bringt si mia auða, sie kann nu mia deita,
und erscht recht numma schimpfa -
deis sei für'd Kinder himmlische Zeita.
Werner, daß deis Projekt gscheid bringsch zum Loufa,
wora mar für di in der Stadt a schiane Raketa koufa.

Senn Anna

Dia WM in St. Anton wor an Hit,
di Anna fiabert dahuam vor'm Fernseher mit.
Kua Renna lot si aus,
wenn an Österreicher gwinnt, flippt si bold aus,
und kann's nit verstiah, wenn si amol verliara,
miar tia dr für die Begeisterung a Raketa spendiara.

Walter Berta

D' Berta hot olli a Gneat und Orbat grod gnua,
oft sieht ma sie spaziera mit'm Poppala vom Bua.
Und wenn d'r Eugen vom Zillertol nit glei huamwearts fohrt,
hosch Dr sogor s'Murmala v'r orbeita d'rsport.
Dia Obschüß wara jo gonz guat grota,
wenn die Murmala nit miaßte di lengscht Zeit im Auto in d'r Sunna brota.
Dia tuire Jogd und Feier im Zillertol kann si d'r Eugen d'rspora,
gang er g'scheiter mit d'r Berta Poppawoga fohra.

Fam Walter Markus Sybille

D'Furierwehr mecht zearsch a mal zum Nachwuchs recht herzlich gratuliera,
stolz geiht dr Markus mit'm Poppawoga in Gurnau spaziera.
Beim Bundesheer in Landeck hat d'r Markus ou numma mega,
drum tuat'r iatz an Sanitätskurs in Wien belega.
Daß enk s'Glick s'negscht Jahr bleibt hold,
iatz noa an heida Böller knollt.

Fam Schütz Erwin Christine

D'r Erwin hat d'r Christine, wia m'r olla wissa,
s'letsch Jahr a rund's Feschtle gschmissa.
Zum 40er tuat d'r d'Furierwehr ou no herzlich gratuliera,
tua nu weiter flott mit dem gelba Flitzer umakutschiera.
A Raketa lassa m'r iatz ou noa marschiera,
daß nou viele selche Feschtle tuasch inszeniera.

Fam Haag Sabine u. Peter

Mit der Scheiba, dia mar weit ocha schloga,
begriäß mar da Peter, di Sabine und bsunders enkern Thomas im Kinderwoga.
Stolz geiht's mit enkern Nachwuchs spaziera,
d'Furierwehr tuat enk herzli gratuliera.
Genießt's dia kurze und schiane Zeit,
wenn im Haus a Poppali schreit.

Pfisterer Bernd

Für Kühlschränk, Waschmaschina u.s.w. isch d'r Bernd d'r richtige Monn
isch eppas hin, ruuft ma ihn uanfoch on.
Voar lauter Zuig hot er bold numma kenna schnaufa,
drum haut er olls auf uan Haufa.
In an Riesacontainer hot er olls incha g'schmissa
ob'r uaner wor sorgor nou zwiani, do hot glei an zwoata hermiassa.
Dia guata Stückla hot er ausbaut, sall isch klor,
entsorgt hot er sicher nu die schlechte Wor.
Und setta miar amol an Brocka für a Waschmaschin braucha,
giahn miar uanfoch zum Bernd auf d'Soga aucha.

Pfisterer Peter

D'r Pete isch ins jo olla bekannt,
er mocht Lawinenverbauunga im gonza Lond.
Aber er muaß decht nou Zeit gnuag hoba
zum ab und zua auf Kappl icha fohra.
Det hot'r nämlich sei Freindin, eh schua seit geraumer Zeit,
aber huira im Summar ischas endlich soweit.
Da weart eppa d'r Pete statt Stahlträger montiera,
hin und wieder da Poppawoga schieba.
Den weard 'r richtig tunen -und tieferlega
bis d'Radla zum Quietscha kema
Ob det a Kind drin liegt, des mega mar bezweifla,
weil der Woga weart ou in der Kurva nit schlecht greifa.
Und daß nit tuasch mit deem Poppala Renna fohra
lossa miar dir iatz nou a Scheiba ocha.

Pfisterer Dieter Köhler Christine

Auf d'r Soga doba sieht ma an Haufa roati Pflöck,
do hot eppa d'r Dietmar an Bauplotz ausgesteckt.
Im Langets weards nocha voarwearts giahn
und glei a nuis Häusli doba stiahn.
Und dass deis Wearkli guat g'lingt
iatz nou zur Scheiba a RAKETA singt.

Fam Carpentari Reinhard Marlies

Dar Reinhard mecht seiner Frau eppas guats tian,
und sagt zu seiner Frau heint muasch amal nit aufstiahn.
Haint fahr nämlich i für die in Samnaun auf Tankstell aucha,
es isch zwar numma viel Benzin drin, aber sou viel weart'r schua nit braucha.
Dar Reinhard fahrt lous und s'Auto louft richtig guat,
er fahrt d'alt Straß aucha und auf uanmal dear Karra stottara anfanga tuat.
Nach'm zwoata Tunnel isch nocha Schluß und deas Vehikel bleibt stiahn,
iatz muaß dar Reinhard halt die restliche 5 Kilometer zfuuß zur Tankstell aucha giahn.
Reinhard, s'negscht mal tanksch vielleicht decht besser in Landeck und tuasch nit in
Samnaun aucha fohra,
nacha tatashtar an mortz Fußmarsch darspara.

Fam Carpentari Sandrino Rosmarie

Keahrt homa, dr Sandrino hat miaßa weit fohra
wo sie des Krankenhausskirennen austroga hoba.
Bis ins Osttirol isch er kema
hat er sie denkt , da werma heint an Pokal huam nehma
zu dem zwoate Plotz tia miar dir gratuliera
und dafür an Böller spendiera.

Fam Carpentari Reinhard Michaela

Beim Reinhard hoba mar olla lei bleid gschaut
hat er huira unter seim Haus a Gartli darzua baut.
Und daß die Kosta nit explodiera,
hot er sich denkt tui miar s'Material salber zuchafiahra.
So hat 'r sich an Schleppar ausgliecha
daß er kann zum Prantauer ocha fiecha.
Mit'ara Fuhr Schottar hot er sich aufn Huamweg gmocht,
des weart der Karra schua heba, des war ja glocht.
Aber wia er in d'Karnotkurve inbiagt
er hinter s'Radli verliert.
D'Vorderradla in dar Luft , da Arsch am Bouda
deis nutzt nuit , den Schotter muaß a Lostwoga hola.
Und daß er kann den Schlepper schnell repariera,
tuat ar'n zum Schlatter Harald in'd Werrkstatt fiehra.
Det tia sie schraubä, klopfä und flickä Tog und Nocht,
bis der Reinhard a ungewollte Probefohrt mocht.
Vielleicht sett mar vorher die Radla montiera
nocha geacht des Vehickel sicher besser zum Rangiera.
Und daß dar des Mißgeschick numma passiert
iatz nou a Scheiba außä marschieret.

Carpentari Jürgen

Nuigkeiten vom Jürgen gibt es viele
denn er war im Urlaub in Chile.
Auf Abenteuerkurs und Erkundungstripp
beim Raften und Reiten wearsch so richtig fit.
Aber um eppas tuat der Jürgen det eppa decht verdrießä
nämlich mit inserer Clique im John's a Bierli in Rocha ochagießä.

Fam Landerer Franz Elfriede

D'r Franz und d'Elfriede hobas schian
do sieht ma olli di tollschta Auto voarm Haus doba stiahn.
Kaum gibt's a nuis Modell,
fohrt d'r Franz auf Gurnau und fiahrt's ins voar gonz schnell.
Drum tuat er iatz viel mit'm Auto fohra
und damit bei seiner Fitness spora.
Z' Fuaß giahn sein noch wia voar guati Socha,
drum lossa miar nou an BÖLL'R krocha.
D' Kondition sett ma d'rhohta,
ma bleibt d'rbei jung und tuat nit olta.

Landerer Claudia

D'Claudia hat im letshta Jahr den Abschluß mit Magister gmacht,
da hat die ganz Familie g'feiert und glacht.
Sie wohnt iatz wieder in Gurnau des ganze Jahr
endlich isch vorbei die Pendlerei und des Gfahr.
Daß ums Studiera tuasch nit verdrießa
wera miar dir no a Raketa schießa.

Marth Christiane

Um'd Christiane moch mar ins kuan Kummer
dia isch in feshta Hand seit'm letshta Summer.
Bis ins Paznaun hat si d'Liab verschloga
was so bsunders isch on da Kappler Buaba , sall weart si ins nit sogä.
Schau amol bei ins vorbei und nimm dein Gert glei mit
weil Scheibaschloga gibt's im Paznaun dinna nit.

Fam Marth Edmund Helene

D'r Edi und d'Helene hoba numma g'locht,
wia d'r Hogl auf deis Hausdoch isch krocht.
Deis lot sie ob'r nit v'rdriaßa
drum hot glei an onders aui miaßa.
Dös Doch spiegelt iatz aui bis zum Sattelit,
do keima inseri Fernseher numma mit.
Do seicha miar im Fernseher nocha gonz genau,
wos Du dahuam olli mochs mit Deiner Frau.

Fam Schultes Hubert Brigitte

An Traktor tuat da Hubert olli fasziniera
ob'r foscht nou lieb'r tuat er musiziera.
Als Almschef isch er am Zommer Berg bekonnt,
do hot er Ollas fescht in d'r Hond.
Ou wenns pressiert geahrt er salber im Summer auf d' Olp,
do bleibt am jung und weard nit olt.
An BÖLL'R hots iatz nou dr'rissa,
bleib nou long jung, weil vo dr Pension willsch Du eh nuit wissa.

Schultes Sandra

Iatz kimmt die Schultes Sandra dran,
schaua mar amal was ma da als schreiba kann.
D'Sandra arbeitet in Leermoos dauða als Kellnerin,
Sandra, da bisch ja fascht im tiafschta Lechtal drin.
Aber es isch kua Wunder daß d'Sandra da dauða geara isch,
da tuat sie nämlich nit lei serviera und abrauma die Tisch.
Weil in Freund vu Nasserreith will sie ja ou öfter seicha,
und da isch ja Leermoos glei in dar Neicha.
Sandra, miar mechta dar lei sogä daßas bei ins ou fesche Buaba geaba tat,
drum kansch ruhig amal vorbeischaua wenn dar weart amal fad.

Vogt Herta

Zum 60-er losst sich's d'Herta nit nehma,
do sella olla Gurnauer Frauä zama keima.
A gonze Terrasse voller Weiberleit beim Kaffee
und mittl't drin dr Hans-Robert im sexy Dress und mit seim Schmääh.
Oll hot's tunkt bei dir doba recht fei
d'Fuirwehr stellt sich heind nochträglich zum Gratuliera ei.
Di schianscht Raketa schiaß mar in Himmel gonz hell,
nit so spektakulär wia beim Innsbrucker Bergsilvester, ober für di speziell.

Vo'r Herta hobam'r huira nit viel z'berichta
s'letscht Jahr hasch iat gmacht vieli außergewöhnlich Gschichta.
Mim Radli tuat d'Herta alli noa umchafahra
und dabei vieli Kilometer auf'n Tacho auimala.
In Innsbruck kann ma viel besser feira,
d'rum tuat d'Herta beim Bergsilvester alli in Innsbruck verweila.

Vogt Helga

Im Winter vom Zirlerberg ocha isch d'Helga dr'hängt oh Graus
wos sell i denn tia, i kenn mi mit dena Ketta nit aus!
In der Noat ruft sie ihren Michael on
aber der wor nit begeistert, der guate Monn:
'Was isch denn los mit dena Powerfrauä
wenn's pressiert, bringa si nit amol Ketta aua!'
Deis loßt sie d'Helga nit zwoamol sogä,
iatz montiert sie die Ketta im Rekord auf ihrn Woga.

Fam Larcher Peter Margret

In Peter mehta mar huirä mit a'ra Raketa begrießa,
er hot nämlich bald da gonza Summar im Spital liega miaßa.
Wie deis genau passiert isch sall weart di eh a jedar salber froga
drum weard di Fuirwehr mit eppas anderm ploga.
D'r Peter schloft im Spital ganz friedlich in der Nacht
und troumt dass auf uamal d'r Ferdl di Tür offmacht.
An Haufa Holz hott'r dabei und sinsch ou nou a Material
was deis weart woäß der Peter nou nit aber isch ja egal.
Auf amol baut dr Ferdl den Weidezaun im Zimmer auf.
Dr Peter schreit sei ruhig, du wecksch mar ja olls au.
Und wear schua traumt vom Arbeita in der Nacht
sich ou bald aufn Huamweg mocht.
Verlora hot dr Peter nit amol im Spital sein Humor
deis kann a jeder bestätiga der bei ihm dunta bsucha war.
Und daß ab und zua über di salber kannsch locha,
lossa mar dr iatz nou an Böller krocha.

Larcher Carmen

D'Carmen hoba m'r s'letscht Jahr in Gurnau gar nit oft kenna entdecka,
wo tuasch di mit'm Dietmar olli verstecka.
Lerna muss Carmen auf d'r Bank ou an Haufa Socha,
weil sie tuat olli Weiterbildungskurse mocha.
Daß m'r di s'negscht Jahr in Gurnau wieder öfters entdecka,
lassa m'r no an Böller verrecka.

Schütz Florian

Da Florian sieht ma seit huira im Lan-Tech bei'ma Büro aussa locha,
des isch sei earscht'r Job, und da mocht er sicher viela interessanta Socha.
Ob ma da Fernseher inscholtat oder Zeitung off-mocht,
ollapott d'r Florian aussa locht.
Und wenn ma so in der Öffentlichkeit steaht,
natürlich privat ou eppas weiter geaht.
Do stiahn die Madla Schlonga vor seim Büro,
aber uane hot'm bsunders gfolla am Floh.
Barbara hoaßt sie, und wohnt z'Brugga daußa,
drum fohrt'r am Obad öfter's Richtung Landegg außa.
Jo wenn ma so a Madli ausfahrt - da muaß all's passa,
s'Ongleg und s'Auto muaß'r ou nou wascha.
Wohrscheinlich hot'r da Woga z'fescht poliert,
weil wo ma auf Grins aucha fohrt, isch'r mit ama ondara kollidiert.
Den muaß'as jo grod so blendet hoba
so glänzt hat der klua-gria Woga.
Dös isch kua Weltuntergang hot er sich g'seiht,
und Werkstott brauch i ou kuane -- i bin decht nit blöd.
Also hott'r sich da Woga salber zam'gflickt ,
dös tat niemand globa, wia a Isolierband guat pickt.
Und daß dös Auto kuan Brocka verliert,
iat nou a Raketa aucha marschiert.

Schütz Caroline

Dr Caro hat's in Gurnau gar numma g'falla,
d'rum hat sie sich in Salzburg g'sucht an nuia Falla.
Lang bisch in Salzburg ab'r ou nit blieba,
hot di eppa s'Huahmweah zruck'trieiba?
Daß iatz amal länger in Gurnau tuasch bleiba,
mir a Raketa in Himmel auchi treiba.

Fam Schütz Egon Sissi

Als schneidigi Autofahrerin isch d'Sissi bekannt im gonza Land,
lei manchmal fahrt sie, bis sie steaht an d'r Wand.
S'letsch Jahr in d'r Friaht will sie wied'r amal auf d'Arbat fahra,
deini Gedanka hasch ab'r eppa beim Einsteiga verlor.
Beim Z'rugweartsfahra heart ma auf amol an große Knall,
und s'Licht vo Florians Auto hat ket an morts Schnell.
Iatz ou no a Raketa in Himmel maschiert,
daß so eppas s'negscht Jahr numma passiert.

Huber Susanne

D' Susanne hat ins amol sella,
den nuia Freind voarstella.
Mir wissa des nou nit gonz
ob'r miar globa , es isch d'r Peter vo Stonz.
Miar tian Dir nou an BÖLL'R schiaßa
und Dein nuia Freind begriaßa.

Fam Huber Robert Gabi

D'r Hans Robert tuat di letschte Zeit a gelb's Auto lenka,
wos weart si eppa d'Nochborschoft denka.
Entweder isch d'r Hans Robert iatz bar Poscht,
oder s'olte Auto isch voll'r Roscht.
Weil miar wissas genau,
s'olte Firmenauto wor decht grau.
Ob gelb od'r grau tuat ins nit irritiera,
Hauptsoch isch, Du tuasch a guat's Brot umchfiahra.

Fam Rainalter Ekehardt Hella

D'r Eki hat huira a Radikalkur g'macht,
da haba die Birka im Garta numma g'lacht.
Da brauchsch du s'negscht mal kuan Gärtner engagiera,
weil deis kannt d'r d'Fuierwehr ou nou fabriziera.
Ekehardt du wearsch wohl muana deis isch schia,
wenn dia Birka do det sou nockat stiah.
Iaz konnsch du dia Sunnastrahla lang genießa,
weil dia Beim wera numma so schnell sprießa.
Und set wochsa gar kuan grüner Ascht
kannsch sie benutza als Fahnenmast.

Rainalter Ekehardt

D'Matura hat d'r Eki s'letsch Jahr packt mit Bravour
braucht hat'r zwar zwoa Mal, ab'r des hat'n Eki nit bracht auß d'r Ruah.
D'r Rost hat im Eki sei Micra Mouse au g'fressa
ab'r ma hat'n glei gsecha mit a'm nuia Auto umchapressa.
Im Herbst isch'r zum Zivildienst kema, des isch besser als marschiara,,
do kann er in Seefeld d'Leit umchiahra.
Daß bei dein nuia Auto tuasch weniger Rost verlierera,
loaßa m'r noa an Böller krepiera.

Fam Scheiber Helmut Martha

Im Winter konns schneiba oder Krotta hogla,
d'Martha sieht ma in See mit di Kinder auf d'r Schipiste umchogla.
Im Summer hoba si s'halb Haus ins Auto packt,
und haba ihren Urlaub in St. Ulrich am Pillersee g'macht.
D'Fuierwerh losst iatz no an Böller krocha,
damit es kennts s'negscht's Jahr wieder so an schina Urlaub macha.

Fam Griëßer Hubert Rosmarie

Das größte Glück auf der Erde
liegt bei so manchem auf dem Rücken der Pferde.
Ober beim Hubert des isch klar
isch des sei Auto gonz und gar.
Alli wenn er var Kircha kimmt
er glei um an Huder springt.
Er wischt und waxlt und poliert
und er nocha erscht ins Haus marschiert.

Fam Schmid Harald Angelika

Bevor iatz die ÖBB weard privatisiert
hot d'r Harald in Berlin die deutsche Bohncomputer studiert.
Als Fohrdienschtleiter wor sogor er fasziniert,
wia do aucha dear deutsche Zug pressiert.
Do kriagt d'r Harald s'earscht mol an Gschwindigkeitsrausch
und d'r zua jed'n Tog mit a poor Biar fahrt er z'Berlin an morz Plausch.
Dia Berliner Göra hoba den Tiroler Bua sicher ong'locht,
hoffentli hot deis d'r Bohn ou eppas brocht.
D' Fuirwehr fohrt iatz auf Berlin Dein Koff'r hola,
und d'rweil lossa miar Dir a RAKETA johla.

Fam Schmid Helmut Linde

D'Weltmeisterschoft z'Anton hot d'r Helmut mitorganisiert
und ou an Teil vo d'r Strecka präpariert.
Dia Pischtachefs hoba sich'r ollas geba
nu d'r Oberschte von der Fis hot damit nit kenna leba
Ou bam Inkoufa in Anton stellt d'r Helli sein Monn,
nu louft er d'rnoch viel z'schnell d'rvon.
Liab'r Helli, wo bisch denn gewesa,
wia sie vom Glücksradla Dein Noma hoba v'rlesa.
Do hatte sie Dir wella foscht zehntausend Schilling refundiera,
ob'r Du wearsch gonga sein Pischta präpariera.
Iatz lossa miar d'r Linde nou an Schuß
daß sie wega dem Gald hot kuan V'rdruß.

Fam Juen Hubert Erika

Vom Sepl der Bua, des isch gwiß,
vom Lerna gonz besessen isch.
Er will bei dena Schandi gonz vorna dran
d' Erika kann stolz sei auf ihren Mann.
Und hot er amol frei wortet dr Sepl schua hort,
dass dr Hubert mit'm Schlepper in'd Neadr fohrt.
Do sieht ma'n nocha d'Mahmaschin ummareißa,
oder oschta mit'm Huanzaeisa.

Fam Juen Josef Paula

Dr Sepl kouft a Kalbli des isch guat
und er es glei in Stall icha tuat.
Die Tir die war a Spaltli offa
drum isch des Kalbli ou glei verschloffa.
Er hat es gsucht bis spat die Nacht
da hat er aber numma glacht.
Dar Bruder tuat da Hund ausfira
dersal kann des Kalbli glei aufspira.
Dr Sepl denkt - iats heng i's on
nocha louft mar ou kuans mia davon.

Juen Monika

D' Moni, dia hot eppas vor,
vielleicht huira, oder ersch s'negschte Johr.
Sie tuat schua fleißig Gschirr inkoufa,
vielleicht will sie aus Gurnau außi loufa.
Sie verloßt da Juena Clan
denn der Freund ,der hot an Plan.
Er mecht in Stanz a Haisli baua
det kann d' Moni nocha beim Fenster in Talkessel schaua.

Fam Siegele Waldemar

Weit isch sie aussi, dia schian Scheiba
iatz tian miar bar Ruth und bam Waldemar bleiba
An Haufa Orbat hoba sie ums Haus
drum schauts olli gonz schian aus.
Nu bar Londwirtschaft kenna miar di nit loba
weil do steht nou s'Gruamat am Bichl doba.
Muasch Dir a poor Geäßla zuchatian,
nocha isch d'r Bichl ou wied'r schian.

Siegele Werner

Da Wenno sieht ma auf viele Bälle im gonza Land
meistens mit ama Madla an dr Hand.
O des Snowboard-fohra macht dem Wenno Fred
schu im Spätsummer hat's ihn am Gletscher s'erstmal glegt.
Weil dir der Winter so guat gfällt
gibt's iatz no an Böller, dass es nu so knallt.

Siegele Gerd

Was weard eppa dr Gerd alli so treiba
in Innsbruck im Casino tuat'r Kugla anreiba.
A paar Tipps hata mir von dir schua geara
denn d' Fuirwehrekassa kannt ruhig voller weara.
Und Freundin, wenn zur Zeit uane hasch, tua sie ins vorstella
sinsch kannta mar die olli no - als Singl ins Internet stella.
(www.graf-gurnau.at)

Siegele Angelika

D'Angelika hoba mar hiura s'erscht Mal zum Schreiba,
drum kriagt sie glei zum Anfang vu ins ihre erscht Scheiba.
D'Angelika hat's aso, wia jeder wenn'r 18 weart,
als aller erschts amal dar Führerschein gmacht keart.
In salla hat sie bestanda mit Leichtigkeit,
und dar 18te Geburtstag war ou numma weit.
Zum Schluß mechta mar nou saga daß dar Angelika hiura d'Matura ins Haus steaht,
mir wischa dar viel Glück und schiaßa dar an Böller daß bei deara Prüfung ja als guat
geaht.

FA Maschler Karl

Beim Maschler, und deis woäß in Graf-Gurnau a jeda,
weara seit jeher Mitsubishi hergeba.
Aber seit kurzem sieht ma nou andere Auto auf'm Platz uma stiahn,
a andere Marke aber ou ziemlich schian.
Dr Maschler tuat iatz nämlich ou Seat verkoufa,
die weara sicher guat loufa.
Daß ou mit dar nuia Automarke s'Gschäft guat geaht und floriert,
schloga mar a Scheiba und hoffa, daß sie nit auf a nuis Autodach fliaht.

Fam Juen Klaus Anna

In Klaus hot packt a Leidenschaft
er sammelt Pokale, jeds Jahr a paar, des war ja glacht.
Und nutzt ou nuit des fleißige Trainiera
nocha tuat er holt mit'm Alter spekuliera.
Beim Rodla isch er olli vorna dron
seit nueschtem schnallt er sich ou wieder d'Schier on.
In der AK 4 fohrt er um an Stockerlplatz mit
ja Klaus so bleibsch ou für'd Fuirwehr olli fit.

Thöni Maria

Mir wissa huira nit was schreiba
weil du tuasch ja die meischte Zeit wo andersch verweila.
Mir winscha dar viel Glück auf deem Lebensweg
und daß dar kua Krankheit steahrt im Weg.

Marianne -Gerhard Kopp (Gäste BRD)

Den BÖLL'R hots iatz d'rrißa
letshta Summ'r hoba miar enk miaße v'rmissa.
A poor Hüttawart sei holt gonz horta,
und tian nou da gonza Winter auf enk zwoa worta.
Für kemate Summer sein dia Hütta-Öffnungszeita
auf d'r Grofer Fuirwehr Homepage-Seita.
Settas eppa dia gonza Hamburger nit globa,
Enk'r Sprichli stehat noch a ou am Bildschirm doba.
Sett noch a nou eppar glouba, deis isch an Schmä, h,
konn er nochschaou unter graf-gurnau.at.